



## The Holy See

---

**IOANNES PAULUS PP. IILITTERAE APOSTOLICAE OMNIBUS OMNIA\* VENERABILI DEI SERVO LUDOVICO PAVONI**

**BEATORUM HONORES DECERNUNTUR** Ad perpetuam rei memoriam. — « Omnibus omnia factus sum » (1 Cor 9, 22). Quod vitae propositum Paulus Apostolus usque tenuit, ad id Venerabilis Dei Servus Ludovicus Pavoni se continenter contulit, quod ad Dei amorem manifestandum per humilem studiosumque pauperiorum fratrum, sibi a Providentia concreditorum, famulatum re illum compulit. Hi fuerunt iuvenes derelicti *Brixiensis* urbis, in qua ipse die XI mensis Septembris anno MDCCLXXXIV natus est. Presbyterali ordine anno MDCCCVII auctus, ab Episcopo suo Gabrio M. Nava suffultus, quem Secretarium itemque Canonicum Cathedralis templi nominavit, Oratorium e pro pauperculis », scilicet « pro adulescentibus illis pannosis ac laceris condidit, qui aliis institutis illius urbis deserebantur. Cum complurium adulescentium, qui ab omnibus deserti in locis quoad mores attinebat periculosus operari cogebantur atque christiana principia in Oratorio percepta amittebant, videret condicionem, illis domicilium, familiam, opus obtulit, Institutum condens anno MDCCCXXI S. Barnabae. « Collegium Artium » voluit, in quo adulescentium tutela cum educationis proposito coniungebatur, quod personae centralitatem amoremque, veluti praesumptionis methodi, ut aiunt, cardines, prae se ferebat. Ipse quoque animadvertit, ut in posterum illis convenienter prospiceretur, oportere ut artem quandam adipiscerentur, qua nulli obnoxii essent et societati utiles; idcirco in S. Barnabae collegio octo officinas, inter quas principem obtinuit locum typographeum, quod primum habitum est artis graphicae institutum. Surdos mutosque quoque recepit, quos perdilexit. Colonia agris colendis in oppido Saiano, prope Brixiam, adulescentibus agricolis destinavit. Ut sua opera sustentaret anno MDCCCXLVII Congregationem Filiorum Mariae Immaculatae, cuius sodales presbyteri - religiosique - ad unam missionem pertinerent ipsique e vitam omnino communem » exigent. In praesentia sui Conditoris charisma variis in Nationibus persequitur Congregatio, rem pastorem educationisque agendo, scripta edendo. Ut suos adulescentes a pyrobolis vastationibusque tempore « Decem Dierum » Brixiensium servaret, Ludovicus Pavoni cum illis Saianum petivit atque sibi peripneumoniam contraxit. De hoc mundo mensis Aprilis die I anno MDCCCXLIX eximia caritatis exemplar demigravit. Per donum sui « perlibenter » factum, tener fuit parvulis postremique ordinis hominibus pater. Omnino divinae Providentiae fidens, aptissima ipse repperit instrumenta ut convenienter adulescentibus subveniretur. Illud « ora et labora » propositum officium fuit eiusdem asseclis commissum, qui vocabantur « fratres operarii ». Omnia sua consilia Ecclesiae Pastorum iudicio demandavit. Oboedientia cum humilitate simplicitateque coniuncta « praecipua virtus » eius religiosae familiae fuit. Virginem Mariam filii pietate dilexit atque Immaculatam « caelestem inspiratricem ac tutricem » putavit Congregationis. Beatificationis Canonizationisque causam anno MCMVIII Brixiae incohata est. Die V mensis Iunii anno MCMXLVII Pius XII decretum de virtutibus heroum in modum exercitis foras emisit in quo Ludovicus Pavoni, appellatus it « alter Philippus Nerius » vel « praecursor » S. Iohanni Bosco vel S. Iosephi Benedicti Cottolengo « perfectus aemulator ». Die XX mensis Decembris anno MMI Nobis coram decretum de mira sanatione Mariae Stevani, Venerabili Dei Servo adscripta, prodiit. Statuimus ut Beatificationis ritus

Romae die XIV mensis Aprilis anno MMII celebraretur. Hodie igitur inter sacra hanc ediximus formularn: «Nos, vota Fratrum Nostrorum Michaelis Giordano, Archiepiscopi Neapolitani, Iulii Sanguineti, Episcopi Brixienis, Petri Cardinalis Rubiano Saenz, Archiepiscopi Bogotensis, Caroli Iosephi Nández, Archiepiseopi Cordubensis in Argentina, Marcelli Angeli Melani, Episcopi Neuqueniani et Administratoris Apostolici Viedmensis, et Romani Arrieta Villalobos. Archiepiscopi Sancti Iosephi in Costarica, necnon plurimorum aliorum Fratrum in episcopatu multorumque christifidelium explentes, de Congregationis de Causis Sanctorum consulto, Auctoritate Nostra Apostolica facultatem facimus ut Venerabiles Servi Dei Caietanus Errico. Ludovicus Pavoni. Aloisius Variara, Maria a Transitu a Iesu Sacramentato, Artemides Zatti et Maria Romero Meneses Beatorum nomine in posterum appellentur, eorumque festum: Caietani Errico die vicesima nona Octobris, Ludovici Pavoni die vicesima octava Maii, Aloisii Variara die decima quinta Ianuarii. Mariae a Transitu a Iesu Sacramentato die vicesima quinta Augusti. Artemidis Zatti die decima quinta Martii, et Mariae Romero Meneses die septima Iulii in locis et modis iure statutis quotannis celebrari possit. In nomine Patris et Filii et Spiritus Sancti ». Quod autem decrevimus volumus et nunc et in posterum vim habere, contrariis minime officientibus rebus quibuslibet. *Datum Romae apud Sanctum Petrum, sub anulo Piscatoris, die XIV mensis Aprilis anno Domini MMII, Pontificatus Nostri quarto et vicesimo. De mandato Summi Pontificis*

ANGELUS card.

---

SODANO

\*A.A.S., vol. XCV (2003), n. 6, pp. 389-391 © Copyright 2002 - Libreria Editrice Vaticana

---

Copyright © Dicastero per la Comunicazione - Libreria Editrice Vaticana